

光绪七年(1881年)

G7-02-006

致潘鼎新^[4]

光绪七年二月初六日

顷接手书，诵悉一一。后院墙屋仍就原基修造，但将屋脊围墙加高，厨房改造五间，抽出火巷，均应如尊旨办理。即令张守备认真监修。估单约需银二千馀两，务飭该守备报明批发，断无自行赔垫之理。省三飘然先去。左相入政府，当有措置。沅帅月内尚难启行。闻西圣病棘，恐一月内出事也。另单四纸附缴。

G7-02-007

复曾官保^[2]

光绪七年二月初七日

沅翁官保姻世叔大人爵前：

连奉二十七、初三、初五日惠示，敬承一一。南云湘毅军随麾下效力有年，将来自应携以赴陇，借资护卫，目前暂留原防，俟启节出都，再行檄调。杨镇玉书二营扼扎要地，若未定何营替防，炮位一切，无处交代，亦难遽移。廷旨以倭使回国，前议未谐，仍飭严加防备，似郭、刘两军撤留，均未便急切定议。本拟开冻后鸿章当乘轮船赴关谒商，兹奉谕于十二日由陆路起程回津，自应拱候驾临，面陈壹是。近日连番霰雪，阴气凝寒，节逾惊蛰，河冰盈尺，似须初十外轮船可通。届时遵示，即令“镇海”驶往老龙头停泊，载运随员等前来，十二三即难必到，想不出月望耳。唐景星稟复，商局派赴秦王岛接运馀勇之船，约望日前后可至，祈预嘱南云等届期妥速照料。惟轮船匆促，不及添灶，欲令馀勇各带四日干粮，至沪后分搭江轮船，并每船专派得力员弁约束之处，均候示遵。手肃布复，敬叩勋祺，馀容晤罄。姻世愚侄李鸿章顿首。

G7-02-008

致张佩纶^[10]

光绪七年二月初九日

幼樵世仁弟馆丈大人阁下：

初三奉二十九日手书，敬承一一。长春起居反复无常，脾胃太亏，恐非药餌所能起，可忧孰甚。倭使续来信，尚未确，似是延宕之局，彼桀骜成性，亦断不肯遽归球地也。连日小雪阴寒，河冰尺许未解，须望后方能通舟。尊拟二十一开课，若铁梅先生柩、眷不行，馆舍亦无容膝处耳，或三月朔亦可。手此奉复，即颂道履。